

Zontât sub. C ae deliberazion dal Consei N.25 dai 04.12.2006

Fat bon cun deliberazion dal Consei N. 21 dai 12.12.2003

Modificât cun deliberazion dal Consei N. 25 dai 04.12.2006

STATÛT

COMUNITÀ MONTANA DEL TORRE, NATISONE E COLLIO

GORSKA SKUPNOST TER, NADIŽA, BRDA

COMUNITÂT DI MONT DE TOR, NADISON e CUEI

STATÛT
COMUNITA' MONTANA DEL TORRE, NATISONE E COLLIO
GORSKA SKUPNOST TER, NEDIŽA IN BRDA
COMUNITÂT DI MONT DE TOR, NADISON E CUEI

PREMESSE

Chest statût al contribuîs a stabilî lis identitâts e la configurazion istituzionâls di un ent tant che la Comunità Montana del Torre, Natisone e Collio – Gorska Skupnost Ter, Nediža in Brda – Comunitât di Mont de Tor, Nadison e Cuei, nassude de fusion des trê antecedentis Comunitâts di Mont des Valadis de Tor, des Valadis dal Nadison e dal Cuei. Al è un impegn che al cjape dentri no dome la aministrazion interessade, ma dutis lis realtâts teritoriâls e demografichis che jê e inclût, rapresentant intal complès e in mût omogjeni i lôr particolârs valôrs sociâi, economics, culturâi, linguistics, storics e ambientâi. In cheste suaze a risaltin in particolâr il spazi e la poie che la azion comunitarie e vûl risiervâ cul fin di tutelâ e di valorizâ lis lenghis, presintis storicamentri intal propri ambit teritoriâl: il furlan e il sloven, fevelâts ancje intes variantis dialetâls locâls.

Il fin al è chel di ricognossi e di disvilupâ lis disposizions previodudis in materie inte Leç n. 482 dai 15 di Dicembar dal 1999 e inte Leç n. 38 dai 23 di Març dal 2001, valorizantindi i indreçaments e i principis, za afermâts inte Cjarte europeane des lenghis regionâls o minoritariis (less spoken languages), firmade a Strasburc ai 15 di Novembar dal 1992.

La partignince ae Union Europeane e je un denominadôr comun che al met adun, dal rest, i programs e lis prospetivis di disvilup de nestre realtât locâl cun chês dongje transfrontalieris di Slovenie, Carintie e dal centri Europe risprietant dut câs lis reciprochis autonomiis e identitâts.

La partignince al “sisteme montagne” e je une altre carateristiche dal teritori comunitari, che, daûr dal articol de Leç Regionâl n. 33 dai 20 di Dicembar dal 2002, e ven par chest cjapade dentri jenfri i obietîfs regionâi di fonde de azion politiche e amministrative che e à il fin di tutelâ e di valorizâ il teritori de mont e di disvilupâ l’ambit socioeconomic e culturâl des popolazions residentis.

A chestis finalitâts si ispiri e si rapuarte dut il costrut statutari inerent i aspiets “ordenaris” che a rivuardin: i orghins, lis struturis tecnicis, lis proceduris programaticis, i istitûts di partecipazion e ogni altre disposizion che si riferìs al funzionament dal ent.

TITUL I – LA COMUNITÂT DI MONT: I ELEMENTS COSTITUTÏFS

Art. 1
(Costituzion)

1.1. La Comunitât di Mont de Tor, Nadison e Cuei, ent locâl teritoriâl, indotât di une sô autonomie statutarie, al è costituît jenfri i Comuns di: Atimis (Attimis, Ahten), Caprive (Capriva del Friuli), Cividât (Cividale del Friuli, Čedad), Dolegne (Dolegna del Collio, Dolenje), Drencje (Drenchia, Dreka), Cormons (Cormòns, Krmin) Faedis (Faedis, Fojda), Gurize (Gorizia, Gorica), Grimac (Grimacco, Grmak), Lusevare (Lusevera, Brdo), Magnan (Magnano in Riviera), Mosse (Mossa), Nimis (Nimis, Neme), Paulêt (Povoletto), Prepot (Prepotto, Prapotno) Pulfar (Pulfero, Podbunjesac), S. Florean dal Cuei (San Floriano del Collio, Števerjan), S. Lenart (San Leonardo, Svet Lienart), S. Luring (San Lorenzo Isontino), S. Pieri dai Sclavons (San Pietro al Natisone, Špietar), Savogne di Cividât (Savogna, Sauodnja), Stregne (Stregna, Srednje), Taipane (Taipana, Tipana), Tarcint (Tarcento, Čenta), Torean (Torreano, Tavorjana).

1.2. La Comunitât di Mont de Tor, Nadison e Cuei, tignint cont des sôs carateristichis gjeografichis politicis e linguistichis culturâls, e pues riassumi il non storic di Slavie Furlane o Venite.

Art. 2
(Sede)

2.1. La Comunitât di Mont e à sede a Sant Pieri dai Sclavons.

2.2. I orghins de Comunitât di Mont a puedin dâsi adun ancje intune altre sede, su decision dal President.

Art. 3
(Simbui distintîfs)

3.1. La Comunitât di Mont e à, tant che segn distintîf, un logo e un confenon.

Art. 4
(Finalitâts)

4.1. La Comunitât di Mont, istituide pe valorizazion des sôs zonis di montagne e pe promozion dal exercizi associât di funzions comunâls, e ispirate la sô organizazion e la sô ativitât a chescj principis e indreçaments:

la tutele e la valorizazion des specifichis identitâts culturâls, architetonichis, storichis, des tradizions e dai ûs des popolazions residentis;

il ricognossiment e la afermazion de sô autonomie e des autonomiis di chei altris intal exercizi des funzions di competence e intal perseguî i obietîfs programatics;

la azion di tutele e di poie aes culturis e aes lenghis furlane e slovene, che a son presintis storicementri intal ambit teritoriâl comprensoriâl, in armonie e pe metode in vore de legislaçion in materie e cui principis gjenerâi fissâts dai orghins europeans e internazionâi;

la promozion de sô identitât istituzionâl tant che strument diret des popolazions e des zonis di montagne, che lu costituissin, e tant che ambit otimâl pal exercizi associât des funzions e/o dai servizis comunâi;

la ativitât di servizis e di poie ai citadins des monts, singui o associâts, par miorâ la cualitât de vite intes zonis di montagne;

il rispjet dai principis di sussidiarietât, idoneitât e diferenziacion intes relaçions cui sogjets publics e privâts e intal davuelziment de proprie ativitât amministrative;

la osservance dai criteris di eficiencie, eficacie e economicitât inte definizion e metode in vore dai obietîfs programatics e intal implei des risorsis a disposizion;

la publicitât, la trasparenca, la imparzialitât e la semplificazion des proceduris amministrativis metudis in vore;

la tutele dal ambient, la difese e il presidi dal teritori.

4.2. In coerenca cu lis finalitâts, ditis parsore, e cu lis sôs disponibilitâts, la Comunitât di Mont e smire in particolâr chescj obietîfs:

l'exercizi des funzions amministrativis conferidis de Regjon e dai siei Comuns;

la metode in vore dai interventis speciâi pe montagne fissâts de Union Europeane;

la individuazion dai modei otimâi di gjestion dai servizis delegâts;

la definizion des formis di acuardi, colaborazion e/o cooperazion cui sogjets publics e/o privâts che a lavorin sul propri teritori cul fin di realizâ obietîfs in comun pal disvilup socioeconomic e teritoriâl;

la programazion dai propis obietîfs di valorizazion des risorsis presintis intes zonis di montagne su la fonde di tiermins coerents, compatibii e sostignibii cu lis liniis programatichis regionâls, nazionâls e europeans, e ancje cu la planificazion comunâl e cu lis dinamichis di marcjât;

la individuazion di formis di gjestion economiche dal teritori reclamant e riscontrant l'acuardi dai interès presints intal ambit comprensoriâl pe realizazion di obietîfs coerents cu lis finalitâts istituzionâls;

la ativitât di progjetazion strumentâl e infrastrutturâl a pro des zonis di montagne e dai propis Comuns;

lis iniziativis pe tutele e pe difese des peculiaritâts culturâls linguistichis, artistichis, folcloristichis, storichis, produtivis e naturalistichis presintis intal teritori comprensoriâl che si ricognossin intes madrîs storichis celtichis latinis, langobardis, furlanis e slovenis des popolazions origjinariis dal lûc. La ative e partecipade colaborazion e cooperazion transnazionâl cui comuns e cu lis comunitâts di lavôr slovenis, carintianis e dal centri Europe cul fin di favorî e rinfuarçâ i rapuarts di bon vicinât cu lis realtâts istituzionâls dai popui che si ricognossin intai ideai di fonde de Union Europeane e de Euroregjon de Mitteleurope.

TITUL II – I ORGHINS DI GUVIER DE COMUNITÂT DI MONT

CJAPITUL I – IL CONSEI DE COMUNITÂT DI MONT

CJAPITUL II – LA ZONTE DE COMUNITÂT DI MONT

CJAPITUL III – IL PRESIDENT DE COMUNITÂT DI MONT

CJAPITUL IV – I CONSEÎRS

Art. 5

(I orghins di guvier de Comunitât di Mont)

5.1. In armonie cu la legjislazion regionâl in materie, i orghins di guvier de Comunitât di Mont a son il Consei, la Zonte e il President.

5.2. I orghins di guvier a fasin lis funzion che ur son stadis tribuidis de leç, di chest Statût e dai regolaments fats bogns dal Consei de Comunitât di Mont tal rispjet dal principi di separazion tra i compits di direzion politiche e chei di direzion aministrative.

CJAPITUL I – IL CONSEI DE COMUNITÂT DI MONT

Art. 6

(Definizion)

6.1. Il Consei al è l'orghin di indreçament politic aministratîf de Comunitât di Mont, titolâr in particolâr di funksions di control su la azion politiche di chei altris orghins di guvier intes formis daûr di chest Statût.

6.2. Il Consei al ven par solit clamât dongje inte sale consiliâr de Comunitât di Mont che e à sede intal Comun di S. Pieri dai Sclavons.

6.3. Il Consei al pues jessi clamât dongje intune des sedis comunâls dai Comuns, cjapâts dentri intal teritori de Comunitât di Mont daûr de decision dal Consei stes o ben daûr de propueste de Zonte.

6.4. Metint in vore l'articul 6 de Costituzion Taliane e in armonie cui principis gjenerai fissâts dai organisims europeans e internazionai cul fin di favorî il mantegniment e il disvilup des lenghis origjinariis, al è ametût l'ûs dal furlan e dal sloven intant dai lavôrs dal consei e des comissions daûr dal articul 7 de Leç n. 482 dai 15 di Dicembar dal 1999; i intervents a vignaran necessariementri e intal stes timp voltâts in lenghe taliane dal consei stes. La verbalizacion e ven fate dome in lenghe taliane.

Art. 7
(Modalitâts di elezion dal Consei)

7.1. I membrîs dal Consei a son elets daûr des modalitâts previodudis de legislazion regionâl in materie e di chest Statût.

7.2. I sindics dai Comuns, cjapâts drentri inte Comunitât di Mont a son membrîs di dirit dal Consei pe durade de lôr cjarie; lôr a puedin delegâ, cun at comunicât al President de Comunitât di Mont, la lôr rapresentance intal Consei a un Assessôr o ben a un Conseîr comunâl in cjarie. L'at di deleghe al specifiche se la rapresentance e à caratar continuatîf o ben si limite ae singule sentade dal Consei; in ogni câs e je escludude la facultât di subdeleghe.

7.3. La nomine dai Conseîrs comunâi di minorance tant che membrîs elets dal Consei de Comunitât di Mont inte misure fissade de leç regionâl, e je fate de assemblee straordinaria di ducj i Conseîrs comunâi di minorance in cjarie. Par Conseîrs di minorance si intindin dome chei che a fasin part des listis che intes consultazions comunâls no jerin colegadis al Sindic in cjarie o ben che si son dissociâts in maniere uficiâl dal grup politic de maiorance originarie.

7.4. La elezion, cun votazion segrete, daûr dal come 3, si davuelç su la fonde di listis di candidâts predisponudis par un numar avuâl al numar dai Conseîrs de Comunitât di Mont che a son di elei. Il vôt al è limitât dome a une preference. A vegnin elets i candidâts che a otegnin la maiorance dai vôts esprimûts. I Conseîrs elets a restin in cjarie par dut il mandât, gjavant dimissions o decjadence.

7.5. La convocazion de assemblee straordinaria daûr dal paragraf precedent e tocje al President de Comunitât di Mont che ogni Sindic dai Comuns, cjapâts drentri inte Comunitât di Mont, i à di comunicâ i nominatîfs dai conseîrs di minorance in cjarie. Cheste comunicazion e à di jessi fate drentri di 10 dîs a tacâ dal riceviment di bande di ogni Sindic dal avîs di convocazion de assemblee straordinaria.

Art. 8
(Atribuzions dal Consei)

8.1. Dongje des competencis dal Consei che i vegnin tribuidis de legislazion regionâl in materie, chest Statût al individue ancje altris competencis pe valorizazion des funzions dal Consei.

8.2. Il Consei de Comunitât di Mont al delibere cun di plui chescj ats:

- a) convenzions cui Comuns e cu lis Provinciis;
- b) partecipazion dal ent locâl a societâts di capitâi.

Art. 9
(Designazion dai rapresentants de Comunitât di Mont)

9.1. Il Consei al delibere i ats di indreçament pal esercizi dai podês di nomine, di designazion e di revoche dai rapresentants de Comunitât, assegnâts al President de legislazion regionâl in materie.

9.2. Se un rapresentant de Comunitât di Mont, cence motîf justificât, al mancje a trê riunions, une daûr di chê altre, dal organisim dulà che al è stât elet, il Consei al vote un at di indreçament motivât pe revoche dal rapresentant di bande dal President; il rapresentant al varà di jessi sintût di persone par stabilî se la sô assence e vedi vût un motîf justificât.

Art. 10

(Comissions consiliârs)

10.1. Il Consei al pues esercitâ lis sôs atribuzions su la fonde dal esam preventîf des propuestis di deliberazion di bande des Comissions consiliârs internis: permanentis, temporaniis e speciâls, straordenariis di studi, di inchieste, di control e di garanzie.

10.2. Il numar e il funzionament des Comissions consiliârs a son fissâts intal regolament sul funzionament dal Consei de Comunitât di Mont.

10.3. Pal moment lis Comissions consiliârs a son costituitis cun deliberazion fate buine a maiorance dai doi tierçs dai Conseîrs assegnâts.

10.4. Lis Comissions consiliârs a àn la facultât di disponi la audizion dai sogjets interessâts de propueste di deliberazion intes formis dissiplinadis dal regolament.

Art. 11

(Prime sentade – conseîr anzian)

11.1. La prime sentade dal gnûf Consei e je fate su convocazion e sot de presidence dal conseîr anzian, intindint par chest il conseîr plui anzian par etât. La sentade e à di jessi convocate dentri di trente dîs de date di riceviment de delibare de assemblee straordenarie, che e ripuarte la designazion dai conseîrs comunâi di minorance daûr dal art. 7 dal Statût.

11.2. La sentade e je risiervade ae validazion de designazion dai conseîrs comunâi di minorance e ae elezion dal President e dai assessôrs.

11.3. La sentade e je publiche e a puedin partecipâ ancje i conseîrs che par chei si discutin lis causis di impediment ae validazion.

11.4. La validazion dai elets e la elezion direte dal President e dai assessôrs a vegnin fatis cun votazion a palês.

Art. 12

(Funzionament)

12.1. Il Consei al è clamât dongje in maniere ordenarie dal President, che al à di fissâ il dì de sentade a mieç di raccomandade cun ricevude indaûr che e à di jessi spedide almancul 5 dîs prime de assemblee o ben cun invîts consegnâts ai Conseîrs dentri dal stes tiermin. La consegne e à di risultâ su la fonde di une declarazion scrite lassade al dipendent o su la fonde de ricevude indaûr de raccomandade.

12.2. Il Consei al è clamât dongje in sentade straordenarie daûr de richieste di un tierç dai Conseîrs in cjarie. In chescj câs la assemblee e à di davuelzisi dentri di 20 dîs de date di riceviment de richieste.

12.3. Intai câs di urgjence l'avîs di convocazion cun relatîf ordin dal dì al à di jessi consegnât o ben comunicât in curt almancul 24 oris prime, ma in chest câs, se la maiorance dai conseîrs presints lu domande, ogni deliberazion e pues jessi rinviade al dì seguitîf.

12.4. Il diferiment de deliberazion daûr dal come 12.3. si verifichê ancje pai ogjets che a àn di jessi tratâts dongje di altris za iscrits intal ordin dal dì di une specifiche sentade.

12.5. Il Consei nol pues deliberâ se no interven la maiorance assolude dai Conseîrs assegnâts; inte seconde convocazion, che e à di davuelzisi intune altre zornade, lis deliberazions a son validis baste

che al intervegni 1/3 dai membris, tarondât. A restin fûr i câs che no previodin une maiorance cualificade.

12.6. Lis sentadis dal Consei a son publichis, gjavant i câs previodûts dal regolament.

12.7. Aes sentadis dal Consei a puedin partecipâ ancje i Assessôrs esternis che dut câs no concorin a determinâ il quorum strutturâl. A puedin intervignî intes sentadis dal Consei, davuelzi la relazion introdutive su lis propuestis di deliberazion di lôr competence, partecipâ ae discussion, ma no àn dirit di vôt.

12.8. Lis deliberazions consiliârs a vegnin cjapadis sù par solit cun votazion a palês, gjavant lis diviersis specifichis disposizions de leç, dal statût o dal regolament.

Art. 13 (Ordin dal dì e consegne)

13.1. La liste dai ogjets di tratâ tes sentadis dal Consei e je fissade dal President, gjavâts i câs di convocazion straordenarie, dulà che la determinazion dai argomenti di discuti e je fate su indicazion dai conseîrs che a àn promovût la sentade.

13.2. L'avîs di convocazion cul ordin dal dì al à di jessi publicât tal Cuadri de Comunitât di Mont, mandât ai Comuns che a 'nt fasin part e trasmetût al domicili dai conseîrs tai tiermins fissâts dal articol parsore.

Art. 14 (Numar legâl e verbalizazion des sentadis)

14.1. Nissune deliberazion e je cjapade dal Consei in mût valit se no je aprovade de maiorance dai votants, gjavâts i câs che e coventi une maiorance cualificade.

14.2. Dal numar dai votants a àn di jessi lassâts fûr i conseîrs che prime de votazion a declarin la lôr astension o no partecipazion ae votazion. Chescj conseîrs, in ogni câs, a contribuissin a determinâ la validitât de sentade.

14.3. No contribuissin invezit a determinâ il numar legâl pe validitât de sentade i conseîrs tignûts a astignîsi daûr des normis di leç e a slontanâsi de stanze.

14.4. Pes deliberazions di nomine che a domandin la siele di un o plui nominatîfs, a son elets i conseîrs che a otegnin plui vôts, almancul che no sedi previodude la nomine di rapresentants de minorance su propueste nominative preventive o almancul che la elezion no previodi un vôt limitât. In câs di paritât al ven elet il conseîr plui anzian par etât.

14.5. In ogni sentade dal Consei, a son redizûts par cure dal Segretari dal Compensori montan i verbâi des deliberazions cjapadis.

14.6. In câs di assence o impediment dal Segretari e dal Vicesegretari, se nomenât, al verbalize un component dal Consei incjariât dal President.

CJAPITUL II – LA ZONTE DE COMUNITÂT DI MONT

Art. 15 (Definizion)

15.1. La Zonte e je l'orghin di guvier de Comunitât di Mont. E je componude dal President de Comunitât di Mont dutun cun altris membrîs, clamâts Assessôrs.

Art. 16
(Composizion de Zonte)

16.1. La Zonte e je componude dal President e di un numar massim di 6 Assessôrs.

16.2. I Assessôrs a puedin jessi elets anje jenfri i citadins, residents in un dai Comuns associâts, che no fasin part dal Consei de Comunitât di Mont o dai Conseis Comunâi, baste che a sedin indotâts des carateristichis domandadis di compatibilitât e di eleibilitât ae cjarie di Conseîr Comunâl e che ur sedin ricognossudis dotis di professionalitât e di esperience in ambit aministratîf che a àn di jessi evidenziadis cuant che al ven presentât il document programatic.

Art. 17
(Elezion de Zonte)

17.1. La Zonte, dutune cul President, e je elete dal Consei inte sô prime sentade daspò de nomine dai Conseîrs di minorance di bande de assemblee straordenarie daûr dal articol 7 prime e subit daûr de validazion dai elets.

17.2. La elezion si davuelç su la fonde di un document programatic, depositât li de segretarie gjenerâl almancul 5 dîs prime de sentade e sotscriet di almancul 1/4 dai Conseîrs assegnâts ae Comunitât di Mont, che al conten la liste dai candidâts aes cjariis di President e di Assessôr e daspò di un dibatit su lis declarazions rindudis dal candidât ae cjarie di President.

17.3. La votazion si davuelç cun scrutini a palês, a maiorance assolude dai Conseîrs assegnâts ae Comunitât di Mont. Par chest a vegnin fissadis trê votazions seguitivis che a àn di davuelzisi in difarentis sentadis dentri il timp massim di 120 dîs a tacâ de esecutivitât de deliberazion de assemblee straordenarie daûr dal articol 7 prime.

17.4. La Zonte e tache il so mandât a pene che la deliberazion di nomine e je diventade esecutive daûr de leç.

Art. 18
(Rapuart di fiducie e mozion di sfiducie costrutive)

18.1. La Zonte e rispuint dal so lavôr devant dal Consei.

18.2 Il President e la Zonte a discjadin de incjarie ta chel stes moment tal câs che e sedi aprovade une mozion di sfiducie costrutive, decidude par apel nominâl cul vôt de maiorance assolude dai Conseîrs in cjarie te Comunitât di Mont.

18.3 Il vôt dal Consei contrari a une propueste de Zonte no 'nt compuarte lis dimissions.

Art. 19
(La votazion de mozion di sfiducie costrutive)

19.1. La mozion e à di jessi sotscriete di almancul 1/4 dai Conseîrs e e pues jessi proponude dome inviars la interie Zonte. E à di contignî la propueste di gnovis liniis politichis aministrativis, di un gnûf President e di une gnove Zonte in conformitât cun ce che al è previodût intai articui prime.

19.2. La mozion e ven metude in discussion no prime di 5 dîs e no dopo di 10 dîs di cuant che e ven presentade.

19.3. La mozion e à di jessi consegnade ai singui components de Zonte dentri di 5 dîs di cuant che e ven presentade.

19.4. Se il President nol procêt cu la convocazion dal Consei intai tiermins dits parsore, al viôt di chest il Conseîr plui anzian par etât, che in chest câs i tocje di jessi a cjâf de sentade.

19.5. Il President e i Assessôrs a intervegnin intai lavôrs de sentade, che si davuelç in forme publiche, e a partecipin ae discussion e, pai Assessôrs che a àn dirit, ae votazion.

19.6. La aprovazion de mozion di sfiducie e compuarte la proclamazion dal gnûf esecutîf proponût.

Art. 20 (Vicepresident)

20.1. Il Vicepresident al è nomenât dal President tra i components de Zonte e al cjape il puest dal President cuant che chest al è impedît o ben assent e tal câs di vacanze de incjarie.

Art. 21 (Revoche dai Assessôrs)

21.1. Ogni assessôr al pues jessi revocât cun deliberazion dal Consei, su proposte motivade e scrite dal President.

21.2. La deliberazion di revoche e pues rivuardâ tal stes contest ancje plui Assessôrs, ma no plui di metât dai components de Zonte.

21.3. La sentade dal Consei, che si à di tignî in forme publiche, no pues vê lûc prime che a sedin stadis esaminadis lis justificazions presentadis dal interessât, se rivadis dentri di 10 dîs de consegne de proposte al interessât, o ben prime che chest tiermin al sedi passât dibant.

21.4. La deliberazion di revoche, par jessi adotade in mût valit, e à di jessi votade par apel nominâl e fate buine de maiorance dai Conseîrs assegnâts dopo che a vedin sintût lis justificazions eventuâls presentadis dal interessât.

21.5. Pe surogazion dai Assessôrs revocâts si aplichin lis disposizions dal art. 23 di chest statût.

Art. 22 (Causis di no eleibilitât e incompatibilitât)

22.1. Lis causis di no eleibilitât e incompatibilitât ae incjarie di President e di assessôr a son stabilidis de leç e di chest Statût.

22.2. Assendents e dissendents, fradis e sûrs, coniugâts, similârs di prin e secont grât no puedin fâ part de Zonte tal stes moment.

Art. 23 **(Durade in cjarie e surogazion)**

23.1. Il President e la Zonte a restin in cjarie pai cinc agns che al dure in cjarie il Consei che ju à elets, e in ogni câs fin che no son sostituîts dai gnûfs elets, lassant fûr il câs de decjadence tant che descrite dal ultin come dal art. 26 chi daûr.

23.2. Il President al clame dongje il Consei, tal câs di pierdite de incjarie di Sindic o di Conseîr Comunâl di bande dal Assessôr, dentri di 30 dîs de comunicazion di chest fat di bande dal Comun interessât, pe surogazion dal assessôr che al à pierdût la incjarie.

23.3. Tal câs di impediment temporani dal assessôr, lis funzions a son fatis dal President o ben, se ancje lui al ves di cjatâsi impedît, dal assessôr plui anzian par etât che nol vedi impediments.

23.4. Tal câs di impediment temporani di ducj i components de Zonte, lis funzions a vignaran fatis di un Conseîr delegât dal Consei.

Art.24 **(Lis competencis de Zonte)**

24.1. La Zonte e à la competence gjenerale aministrative su ogni at che la legjislazion regionâl in materie e chest statût no risiervin al Consei, al President, al Diretôr Gjenerâl, al Segretari o ai dirigjents e ai responsabii dai servizis.

24.2. Il Regolament de Zonte sul ordenament dai uficis e servizis al stabilîs lis modalitâts di esercizi dal podê di nomine che la legjislazion regionâl e atribuîs ae Zonte, par ce che al inten i responsabii dai uficis e dai servizis e incjariis pai dirigjents. La discipline di regolament si uniforme aes direttivis di chest statût.

24.3. Par ats di competence dal Consei, daûr dal art. 8, i spiete ae Zonte di fâ la propueste pe aprovazion dal Consei.

Art. 25 **(Modalitâts di funzionament)**

25.1. La Zonte si da adun su convocazion dal President ogni volte che al covente o che il President al ritegni just convocâle.

25.2. La Zonte e à da cjâf il President e, tal câs che lui nol sedi presint, il Vice President. La Zonte si da adun in mût valit cuant che e je presinte la maiorange dai siei components.

25.3. La Zonte e pues deliberâ se la maiorange semplice dai siei components e je presinte ae riunion.

25.4. Lis sentadis de Zonte no sono publichis. A puedin partecipâ, cence dîrî di vôt, esperts e tecnicos clamâts dal President a riferî su problemis particolârs.

25.5. In ogni sentade de Zonte, a son redizûts par cure dal Segretari de Comunitât di Mont i verbâi des deliberazions adotadis.

25.6. In câs di assence o impediment dal Segretari e dal Vicesegretari, se nomenât, al verbalize un component de Zonte incjariât dal President.

Art. 26 **(Causis di decjadence de Zonte)**

26.1. La Zonte e discjât tal câs di aprovazion di bande dal Consei de mozion di sfiducie costrutive dai art.18 e 19 chi parsore.

26.2. La Zonte e discjât cun di plui tal câs di dimissions dal President o ben di dimissions di plui di metât dai siei Assessôrs. La decjadence e à efiet de elezion de gnove Zonte, tai tiermins stabilîts dal art. 17 chi parsore.

26.3. Ogni volte che e ven rignuvide, ancje in tîmps diferents, la maiorance dai Sindics che a componin il Consei al moment de elezion de Zonte in cjarie, la Zonte e discjât cun efiet de elezion de gnove Zonte tes formis dal art.17 chi parsore e il Consei al è convocât di dîrî in sentade straordinarie dal Conseîr anzian.

Art. 27 **(Decjadence dai singui Assessôrs)**

27.1. I singui Assessôrs a puedin discjadi de lôr incjarie:

- a) se si verifichin un dai impediments, des incompatibilitâts o des incapacitâts contempladis de leç e di chest Statût;
- b) se no son presints a trê sentadis de Zonte, une daûr di chê altre, cence motîf justificât.

27.2. La decjadence dai singui Assessôrs e je pronunciade dal Consei su proposte dal President.

Art. 28 **(Dimissions dal Assessôr)**

28.1. L'Assessôr al discjât de cjarie tal câs di dimissions.

28.2. Lis dimissions a son presentadis al President che al informe il Consei in maniere che a 'nt cjapi at e al elei un Assessôr gnûf dentri di 60 dîs de lôr presentazion.

28.3. Lis dimissions si puedin revocâ fin che il Consei no 'nd à cjapât at.

Art. 29 **(Dimissions dai Assessôrs e decjadence de Zonte)**

29.1. Tal câs di dimissions contemporaniis di plui di metât dai Assessôrs, la Zonte e discjât. Il Consei al cjape note di chest fat e al elei, tal stes contest, un gnûf President e une gnove Zonte dentri di 60 dîs de presentazion des dimissions.

CJAPITUL III – IL PRESIDENT DE COMUNITÂT DI MONT

Art. 30 (Definizion)

30.1 Il President al è il rapresentant legâl de Comunitât di Mont. Al soreintint ae direzion unitarie, politiche, gjestionâl e amministrative dal Ent e a 'nt coordene la ativitât.

Art. 31 (Elezion e durade in cjarie)

31.1 Pe elezion e pe durade in cjarie dal President si va daûr di chês stessis modalitâts dal art. 17 chi parsore pe elezion de Zonte.

31.2 Tal câs di muart o di impediment permanent, di decjadence pes causis descritis dal art. 33 di chest Statût o di rimozion dal President tai altris câs previodûts de leç, lis funziions a vegnin fatis in vie provisorie dal Vice President, intant che il Consei anzian al convoche il Consei par elei une gnove Zonte e un gnûf President dentri di 30 dîs dal fat.

31.3 Tal câs di pierdite de incjarie di Sindic o di Consei Comunâl si comportisi te stesse maniere dal come precedent, cu la surogazion, plui indevant, dal gnûf rapresentant dal Comun interessât.

Art. 32 (Atribuzions dal President)

32.1. Il President al è legâl rapresentant de Comunitât di Mont, al clame dongje e al è da cjâf dal Consei e de Zonte e al decît su chescj aspjets relatîfs ae amministrazion dal Ent:

- a) al soreintint ae ativitât politiche, amministrative e gjestionâl e ae esecuzion dai ats, doprant i struments di programazion e ancje di verifiche e di control, predisponûts par chest;
- b) al à la rapresentance gjenerâl dal Ent e al pues stâ in judizi intai procediments jurisdictionâi o amministratîfs tant che atôr o convignût;
- c) al da direttivis gjenerâls al Diretôr Gjenerâl par chel che al rivuarde i indreçaments funzionâi e di vigjilance su dute la gjestion amministrative di ducj i uficis e i servizis;
- d) al verifiche la corrispondence dai risultâts de gjestion amministrative cu lis direttivis gjenerâls assegnadis.

32.2. Rispetant i indreçaments deliberâts dal Consei, il President al esercite il podê di nomine dai rapresentants de Comunitât di Mont daûr dal articul 9 di chest Statût. Al President i tocje ancje:

- a) proponi, daspò di vê sintût la Zonte, lis materiis di tratâ intes sentadis dal Consei;
- b) clamâ dongje e jessi da cjâf de conference dai Cjâfs grup consiliârs daûr de discipline regolamentâr;
- c) ricevi lis interogazions, lis interpelancis, i ordins dal dì e lis moziions che a àn di jessi sotponûts al Consei se a rivin almanco 10 dîs prime de convocazion.

32.3. Il President al promôf e al cjape la iniziative par concludi acuardis di programs e convenziions cun ducj i sogjets publics previodûts de leç. Al conclût acuardis cui sogjets privâts interessâts cul fin di fissâ il contignût discrezionâl dal proviodiment finâl che al à di jessi adotât ae fin di un procediment aministratîf che si è davuelt in contraditori cun sogjets privâts.

32.4. Il President al adote ducj chei altris proviodiments di nature discrezionâl e no colegjâl che il Statût o il regolament su la organizazion dai uficis e dai servizis no vedi di pueste delegât ae competence dal Diretôr Gjenerâl, dal Segretari o dai dirigjents o dai responsabii dai servizis.

32.5. In câs di urgjence il President al à la facultât di cjapâ sù ogni at di competence dai orghins colegjâi de Comunitât di Mont cul oblic di sotponilu a ratifiche inte prime sentade utile seguitive.

Art. 33

(Modalitâts di sostituzion dal President)

33.1. Tal câs di assence o di impediment no permanent dal President, lis sôs funzions a vegnin fatis dal Vice President dal moment de comunicazion e fintant che a durin la assence o l'impediment.

33.2. Tal câs di vacance de incjarie, lis funzions dal President a vegnin fatis di dirit dal Vice President fintremai ae gnove elezion de Zonte di bande dal Consei.

Art. 34

(Decjadence dal President)

34.1. Il President al decjât de incjarie tai câs segnâts chi sot:

- a) par condane penâl, daûr des normis di leç, cun sentence che no pues jessi revocade;
- b) pe pierdite de cualitât di Conseîr, e ancje pe cessazion de incjarie di Sindic o di Conseîr Comunâl;
- c) tal câs che e sedi survignude une des causis di no eleibilitât o di incompatibilitât previodudis de leç;
- d) par dimission contemporanie di plui di metât dai Assessôrs che a fasin part de Zonte;
- e) par aprovazion de mozion di sfiducie descrite dai art. 18 e 19 chi parsore.

Art. 35

(Dimissions dal President)

35.1. Lis dimissions dal President a son consegnadis al Segretari che, dopo vêlis protocoladis, al informe i Conseîrs dentri di 15 dîs.

35.2. Lis dimissions a compuartin la decjadence de Zonte.

35.3. Dentri di 60 dîs de presentazion, il Consei a 'nt cjape at e in chel stes moment al elei un gnûf President e une gnove Zonte; prime che il Consei a 'nt vedi cjapât at, lis dimissions a puedin jessi revocadis.

35.4. Passâts 60 dîs de presentazion des dimissions cence che il Consei al vedi proviodût a fâ ce che al è stabilît dal come chi parsore, a 'nt ven informât l'Assessôr Regjonâl pes autonomiis locâls par ce che al è di competence.

CJAPITUL IV – I CONSEÎRS

Art. 36
(Funzions)

36.1. I conseîrs a àn dirit di iniziative su ogni cuistion sometude ae deliberazion dal Consei e lu esercitin tes modalitâts previodudis dal regolament dal Consei. A àn dirit, cun di plui, di domandâ la convocazion dal Consei tes modalitâts previodudis dal regolament dal Consei e di presentâ interrogazions, interpelancis e mozions.

36.2. I conseîrs a àn il dirit di otignî dai uficis de Comunitât di Mont, e ancje des aziendis e dai ents che a dipendin di chest, dutis lis notiziis e lis informazions in lôr possès che ur puedin coventâ par puartâ indevant il lôr mandât. I conseîrs a àn il dovê di tignî il segret in ducj i câs stabilîts de leç.

36.3. Il President de Comunitât di Mont o i assessôrs delegâts di lui a rispuindin dentri di trente dîs aes interrogazions, aes interpelancis e a ogni altre istance di sindacât ispetîf presentade dai conseîrs, almancul che il regolament dal Consei nol previodi un tiermin diferent. Lis modalitâts di presentazion di chescj ats e des lôr rispuestis a son disciplinadis dal regolament dal Consei.

Art. 37
(Grups consiliârs)

37.1. I conseîrs a puedin costituîsi in grups consiliârs.

37.2. Ogni grup al à di jessi componût di almancul 3 conseîrs.

37.3. I conseîrs che no puedin costituî un grup o che no vedin declarât di volê fâ part di un grup a formin il grup mist.

37.4. Ogni grup al elei un president; tal câs che il cjâf grup nol vedi di jessi presint, al fâs lis sôs funzions il vice cjâf grup, li che al è segnât, o il conseîr anzian di ogni grup.

37.5. Il regolament al discipline lis modalitâts di costituzion e di funzionament dai grups consiliârs, li che a son istituûts, e ancje la gjestion des risorsis assegnadis pal lôr funzionament.

Art. 38
(Conference dai cjâfs grup)

38.1. La conference dai cjâfs grup e je costituide dal President de Comunitât, che i è da cjâf, e dai cjâfs grup dai singui grups consiliârs.

38.2. I spiete ae conference dai cjâfs grup:

- a) di colaborâ cul President te predisposizion dal ordin dal dî des sentadis dal Consei;
- b) di garantî la informazion ai citadins su la ativitât de Comunitât;
- c) di davuelzi ogni altri compit assegnât dal regolament dal Consei e dai regolaments di metude in vore dal statût.

38.3. Lis decisions formâls de conference dai cjâfs grup a vegnin cjapadis cun vôt proporzionât ae grandece dai singui grups.

Art. 39
(Dimissions dal Conseîr eletîf)

39.1. Lis dimissions a stan intal indreçâ une declarazion scrite dal Conseîr eletîf, che e à par ogjet la rinuncie ae cjarie, al President o, intal câs di dimissions dal President, al Segretari, e al Comun di partignince.

39.2. Lis dimissions a àn di jessi cjapadis sù daurman li dal protocol de Comunitât di Mont daûr dal ordin di timp di presentazion. A son irevocabilis, no àn dibisugne di jessi cjapadis in at e a son subit eficacis. Ancje dome la decjadence dal Conseîr elet e compuarte la sostituzion dal stes.

39.3. Il Consei, dentri di dîs dîs, almancul che il regolament dal Consei nol stabilissi un tiermin diferent, al procêt ae suoghe dai conseîrs eletîfs dimissionaris cun deliberazions separadis, lant daûr dal ordin di presentazion des dimissions come che a risultin dal protocol, tes modalitâts di elezion fissadis dal art. 7 e dal regolament dal Consei. Nol covente procedi ae suoghe tal câs che si vedi di ordenâ il dissioziment dal Consei pes dimissions presentadis, tal stes moment o tal zîr di 60 dîs, de maiorance dai conseîrs eletîfs, o par altris causis previodudis de leç e dal statût.

39.4. La deliberazion di sostituzion e je comunicade al Conseîr interessât e al Comun di partignince.

Art. 40

(No eleibilitât, incompatibilitât, decjadence e suspension dai Conseîrs)

40.1. No puedin jessi elets tant che Conseîrs de Comunitât di Mont chei che a àn causis in cors cu la Comunitât di Mont e chei che a son titolârs di cualsei gjenar di rapuart juridic in cors cu la Comunitât di Mont.

40.2. I Conseîrs a colin de cjarie cuant che, daspò de elezion, e capite une des causis di incompatibilitât previodudis dal come prime e il Conseîr no le elimini.

40.3. Lis modalitâts di contestazion des causis di no eleibilitât e di incompatibilitât a son disciplinadis dal regolament dal Consei.

40.4. I Conseîrs eletîfs e chei delegâts in maniere continuative daûr de legjislazion regjonâl in vore in materie, a colin de cjarie ancje se no partecipin a trê sentadis consecutivis dal Consei cence dâ motîf justificât o ben cuant che, par cualsei reson, a lassin la cjarie di Sindic o di Conseîr comunâl intal Comun di partignince.

40.5. La cessazion de cjarie di Conseîr e compuarte la pierdite di chês altris cjariis eventualmentri esercitadis inte Comunitât di Mont.

40.6. Daspò de declaratorie di decjadence, cjapade sù daûr des modalitâts previodudis dal regolament dal Consei, il Consei al procêt cu la sostituzion dai Conseîrs eletîfs decjadûts, come previodût dal articul 39, come 39/3 dentri e no dopo di 10 dîs dal dipuesit li de segretarie de deliberazion che e declare la decjadence, gjavant che al sedi previodût un tiermin diviers intal regolament dal Consei.

40.7. In câs di suspension dal Conseîr eletîf dal esercizi des sôs funzions intai câs previodûts de leç, il Consei al procêt cu la sostituzion daûr des modalitâts fissadis intal regolament dal Consei.

40.8. Se al decjât o al ven sospindût un Conseîr che al è stât delegât in maniere continuative, i subentre in automatic il Sindic che al à il podê di deleghe e che dopo al podarà delegâ la rapresentance a un altri Assessôr o Conseîr dal so Comun.

TITUL III – LIS FUNZIONI CJAPITUL I – ATRIBUZIONI

Art. 41
(Funzions)

41.1. I spiete ae Comunitât di Mont, tant che eventuâl sogjet delegât, l'escrizi associât des funzions amministrativis propriis dai Comuns o a chescj conferidis midiant di leç statâl o regionâl, e ancje la promoziun dal escrizi associât des stessis funzions.

I Comuns a esercitin funzions in forme asociade, conferintlis ae Comunitât di Mont o convenzionantsi jenfri di lôr in chescj setôrs:

- a) costituzion di struturis technichis amministrativis di poie aes ativitâts istituzionâls dai Comuns, cun particolâr riferiment ai compits di assistence al territori;
- b) gjestion dal personâl;
- c) sisteme informatîf territoriâl;
- d) racuelte e smaltiment dai refudums solits urbans, cun eventuâl trasformazion in energjie;
- e) organizazion dal traspuart locâl e, in particolâr, dal traspuart scolastic;
- f) organizazion dal servizi di polizie municipâl;
- g) servizi socioassistenziâi cun particolâr riuart ae realizazion di struturis di servizi sociâl pai anzians, che a rivin a rispuindi aes dibisugnis de popolazion locâl cu la preminente finalitât di permetiur la permanence intai comuns di montagne;
- h) realizazion di struturis sociâls di orientament e di formazion pai zovins cu la preminente finalitât di permetiur la permanence intai territoris di montagne;
- i) realizazion e gjestion di oparis publichis di interès dal territori di lôr competence e in particolâr realizazion e gjestion di acuedots e di implants di fognadure e di depurazion;
- j) viabilitât di interès intercomunâl e gjestion des stradelis pal trafic di montagne;
- k) servizi scolastic;
- l) gjestion dal servizi di rimozion de nêf;
- m) gjestion dal patrimoni boschîf e silvopastorâl;
- n) realizazion e gjestion dai implants ricreatîfs sportîfs di interès turistic e di rilevanca sorecomunâl;
- o) realizazion e gjestion di museus e di bibliotechis;
- p) realizazion e gjestion di struturis culturâls di rilevanca sorecomunâl.

L'escrizi in forme asociade des funzions daûr dal come 1, a mieç di conferiment ae Comunitât di Mont, al comprint ancje, dulà che al covente, la competence de Comunitât di Mont par davuelzi lis relativis proceduris di espropriazion e di servitût par utilitât publiche.

41.2. La Comunitât di Mont e je titolâr di dutis lis funzions amministrativis, za assegnadis des leçs statâls e regionâls, e di chês altris sôs funzions, individuadis de leç regionâl n. 1 dal 2006.

41.3. Ae Comunitât di Mont i tocjin ancje dutis lis funzions conferidis de Regjon, des Provinciis e dai Comuns intal propri ambit territoriâl.

41.4. In particolâr la Comunitât di Mont e met in vore i intervents speciâi pe montagne fissâts de Union Europeane o des leçs statâls e regionâls e e esercite, intal ambit des zonis di montagne omogjenis di competence, lis funzions e i compits amministratîfs in chescj setôrs;

- a) difese dal teren, tutele e valorizazion dal ambient;
- b) boscs;
- c) agriculture;
- d) sparagn energjetic e riscjaldament;
- e) turisim;
- f) cumierç.

41.5. Cul fin di realizâ lis propriis finalitâts la Comunitât di Mont e davuelç o ben e concor a davuelzi chestis funzions di programazion;

- a) e adote il program trienâl, che in conformitât cul plan regionâl di disvilup de montagne, fat bon de Regjon, al definîs lis prioritâts e al individue lis oparis, i interventis e i struments juscj par perseguî i obietîfs dal disvilup socioeconomic de montagne;
- b) e viôt ogni an dal inzornament dal program trienâl, in concomitance cu la aprovazion dal bilanç di prevision e dai documents di programazion finanziarie;
- c) e compile ogni an il rapuart di metode in vore dal program trienâl tant che rindicontazion dai finanziaments erogâts a valê sul plan regionâl par ce che al rivuarde lis risorsis regionâls;
- d) e concor, midiant de formulazion di propuestis, ae definizion dal plan trienâl regionâl di disvilup de montagne e ai relatîfs inzornaments anuâi;
- e) e coopere e colabore cun Ents locâi regionâi, nazionâi e transfrontalîrs inte predisposizion dai programs, dai bants e dai progjets previodûts des disposizions europeanis in materie di disvilup socioeconomic e culturâl dai propriis territoris.

CJAPITUL II – ORGANISIMS CONSULTÎFS

Art. 42 (Deleghe e avaliment)

42.1. In riferiment a funzions diferentis des sôs o di chês che i son tribuidis, la Comunitât di Mont e pues jessi destinatarie di deleghe di funzions di bande de Regjon. La individuazion dai orghins competents al exercizi des funzions delegadis, dai vincui programatics, des modalitâts di exercizi e dai modei de azion amministrative e je fate cuntune leç regionâl di deleghe o, se cheste no je, cuntun proviodiment specific di bande de Zonte regionâl.

42.2. Simpri cun riferiment a funzions diferentis di chês sôs o di chês che i son tribuidis, la Regjon e pues avalêsi de Comunitât di Mont pal exercizi di funzions di amministrazion ative o consultivis.

TITUL IV – LA ATIVITÂT DI PROGRAMAZION

CJAPITUL I – ATIVITÂTS DI PROGRAMAZION

Art. 43 (Programazion)

43.1. La ativitât di programazion de Comunitât di Mont e ven definide e metode in vore in sintonie cul plan regionâl di disvilup des zonis di mont e cui siei struments finanziariis.

43.2. Cun cheste finalitât, la Comunitât di Mont e adote un program trienâl, inzornât an par an, che, in conformitât cul plan regionâl di disvilup des zonis di mont, al cjape in considerazion: la individuazion des oparis, dai interventis e dai struments adats a perseguî i obietîfs dal disvilup sociâl e economic des zonis di mont; la definizion des prioritâts des oparis e dai interventis.

Art. 44 (Formazion e aprovazion)

44.1. I ats programatics dal Ent, daûr dal art. 43, a son predisponûts de Zonte.

44.2. La Zonte, in sede di formazion dai Programs, e invie consultazions cun Comuns, associazions, ents e sogjets soci-economics dal territori pe conciertazion e individuazion dai obietîfs.

44.3. La ativitât di control de atuazion dai ats programatics si davuelç daûr des prescrizions di leç e regolamentârs.

Art. 45
(Inzornament e metode in vore)

45.1. Il program trienâl al ven inzornât an par an in relacion aes dibisugnis obietivis di variazion e/o di justament ai inzornaments dal plan regionâl di disvilup des zonis di mont, adotant chel istès procediment dal articol precedent.

TITUL V – ORDENAMENT DAI UFICIS E DAI SERVIZIS

CJAPITUL I – PRINCIPIIS

Art. 46
(Organizazion strutturâl)

46.1. La struture organizative dal Ent si adegue aes esigjencis funzionâls e gjestionâls che a derivin dal davuelziment de ativitât istituzionâl e ancje aes sôs dimensions, in mût di sigurâ l'esercizi plui eficaç e eficient des funzions e competencis assegnadis e secont il principi che cheste e je strument rispjet ai obietîfs fissâts de aministrazion.

La Comunitât di Mont, su la fonde dai criteris di autonomie gjestionâl, funzionalitât, economicitât di gjestion e operativitât, e viôt de organizazion funzionâl dai uficis, inte sede ricognossude e previodude dal articol 2 di chest Statût, pûr mantignint sportei intes altris dôs localitâts periferichis di Tarcint e di Cormons par garantî un servizi puntuâl ae popolazion dal lûc.

46.2. La organizazion de articolazion, dite parsore, e vignarà disciplinade di un regolament specific sul ordenament dai uficis e dai servizis e secont i principis contignûts in chest Statût.

46.3. Metint in vore l'articol 9 de Leç n. 482 dai 15 di Dicembar dal 1999, e vignarà sigurade la presince di personâl cun cognossince specifiche dal furlan e dal sloven, ancje intes varietâts dialetâls locâls cul fin di garantî l'ûs orâl e scrit des lenghis mancual pandudis di antîc insediament, tuteladis de leç.

46.4. Inte sede principâl de Comunitât di Mont de Tor, Nadison e Cuei (S. Pieri dai Sclavons) e intes localitâts di Tarcint e di Cormons a puedin jessi vierzûts sportei cun personâl plurilengâl che al cognòs lis lenghis tuteladis: il furlan e il sloven.

Art. 47
(Principis organizatîfs)

47.1. La struture organizative de Comunitât di Mont e va daûr di chescj criteris:

- a) organizazion dal lavôr par procès, programs e progjets realizabii e compatibii cu lis risorsis a disposizion, intune logjiche di servizi;
- b) unitarietât dal sisteme normatîf di competence;
- c) razionalizazion e semplificazion des proceduris operativis, cu la aplicazion di gnovis tecnicis gjestionâls e metodologjîis di lavôr e ancje cu la introduzion di tecnicis informativis e di control de ativitât fate;
- d) valorizazion dal concet di capacitât gjestionâl e realizative e di disvilup de unitarietât de gjestion;

- e) superament dal sisteme funzionâl di stamp jerarchic traviers di une organizazion dal lavôr par procès e competencis, funzions e programs, cu la introduzion de massime flessibilitât de organizazion des struturis operativis e de massime mobilitât dal personâl, ancje introdusint proceduris di nature di dirit civîl;
- f) valorizazion de integrazion e de relazion tra unitâts operativis e personâl, e ancje valorizazion dal principi di responsabilizazion;
- g) creazion, in colaborazion cui ents associâts e chês altris Comunitâts, di centris di servizis specializâts, direzûts des figuris professionâls plui adatis, ancje doprant il personâl dai ents stes, in maniere di razionalizâ lis struturis operativis e garantî vantaçs sul plan gjestionâl e de erogazion dai servizis.

CJAPITUL II – IL DIRETÔR GJENERÂL E/O IL SEGRETARI

Art. 48 (Diretôr gjenerâl)

48.1. Il Diretôr gjenerâl, se nomenât, al rapresente la autoritât plui alte tal aparât gjestionâl de Comunitât di Mont.

48.2. Lis competencis dal diretôr gjenerâl a son chês indicadis culi:

- atuazion dai orientaments e dai obietîfs fissâts dal President e de Zonte;
- sorintendence ae gjestion dal ent;
- perseguî i livei miôr di eficacie e eficiencia;
- sorintendence e coordinament dai dirigjents e, se a mancjin, dai responsabii dai uficis e dai servizis;
- predisposizion de propueste dal plan esecutîf di gjestion;
- predisposizion de propueste dal plan in detai dai obietîfs.

48.3. Lis modalitâts di assunzion e/o di atribuzion de incjarie, come ancje lis modalitâts di chei altris compits, a son disciplinadis dal Regolament sul ordenament dai uficis e dai servizis comprensoriâi, di competence de Zonte de Comunitât di Mont.

48.4. Al Diretôr gjenerâl a puedin jessi tribuidis ancje lis funzions di Segretari de Comunitât di Mont.

Art. 49 (Responsabilitât)

49.1. Il Diretôr Gjenerâl al è responsabil de coretece amministrative a rivuart de azion burocratiche gjenerâl e al è ancje dret responsabil pes iniziativais e pai compits che i son stâts afidâts, e parie cui dirigjents e cui responsabii di servizis, dai ats e des proceduris atuativis dai proviodiments deliberatîfs dai orghins di guvier.

49.2. Al è responsabil dal risultât de ativitât davuelte dai uficis dulà che al è a cjâf, de realizazion dai programs e dai progjets che i son stâts afidâts, de gjestion dal personâl e des risorsis finanziariis e strumentâls che i son stadis assegnadis. A tacâ di ogni an al presente al President e al Consei une relazion su la sô ativitât che al à davuelt l'an prime.

49.3. No si tocjin lis disposizions in vore in materie di responsabilitât penâl, civîl, amministrative contabil e disciplinâr previodudis pai dependents des Amministrazions Publichis.

CJAPITUL III – IL SEGRETARI

Art. 50 (Segretari)

50.1. Il Segretari, rispjetant lis liniis programaticjis e economicjis, des sieltis e dai indreçaments aministratîfs, lant daûr des indicazioni dal President e dai Orghins Colegjâi, al cure la istrutorie e la redazion dai proviodiments deliberatîfs e al partecipe, cence dirit di vôt, aes riunions de Zonte e dal Consei.

50.2. Al esercite la sô responsabilitât funzionâl sedi a nivel gjenerâl sedi a nivel di program e/o progjet specific, cun capacitât autonome di siele metodologjiche e procedurâl.

50.3. Al adote ats internis di caratar istituzionâl e di rilevance esterne, sedi negoziâi che a contignût vincolât, come specificâts tal regolament pal ordenament dai uficis e dai servizis.

50.4. Il segretari cun di plui:

- a) al scrîf i contrats e i ats tal interès esclusîf de Comunitât di Mont;
- b) al fâs ogni altre funzion che i è assegnade di chest statût o dal regolament pe organizazion dai uficis e dai servizis o che i je tribuide dal President.

50.5. Il segretari al ven nomenât dal President, pe durade massime dal so mandât.

Art. 51 (Vice Segretari)

51.1. Comunitât di Mont al pues nomenâ un Vice Segretari.

51.2. Il Vice Segretari al fâs funksions vicjariis e di supuart al Segretari, assistintlu tal davuelziment de ativitât aministrative, gjenerâl e particolâr, cjapant il so puest tai câs di assence o impediment e fasint lis funksions di Segretari cuant che chest nol è.

51.3. Il status juridic e economic dal Vice Segretari al è disciplinât dal regolament sul ordenament dai uficis e dai servizis li che a vegnin ancje specificadis lis responsabilitâts particolârs che i son assegnadis.

CJAPITUL IV – LA DIRIGJENCE

Art. 52 (Compits dal dirigjent)

52.1. Il dirigjent al à di meti in vore ats e ativitâts par rivâ ai obietîfs fissâts dai orghins di guvier. Par chest al organize e al dopre lis risorsis umanis, finanziariis e strumentâls che i son assegnadis, cjapantsi plene responsabilitât. I tocjin al dirigjent ducj i compits e la adozion di ats previodûts de normative in vore, di chest statût e dal regolament pe organizazion dai uficis e dai servizis.

52.2. I rapuarts tra orghins di guvier e dirigjent a van daûr di principis di lealtât, cooperazion e strumentalitat de azion dirigjenziâl rispiet ai obietîfs fissâts de aministrazion.

Art. 53
(Responsabilitât)

53.1. Il dirigjent al à la responsabilitât di puartâ indevant lis funzions che i son assegnadis, e ancje dal bon andament e de imparzialitat de organizazion operative che al soreintint.

53.2. Al è responsabil dal risultât de ativitat puartade indevant di lui in maniere direte e di chê puartade indevant dai uficis sot de sô soreintendence, de realizazion dai programs e dai progjets che i son afidâts, de gjestion dal personâl e des risorsis finanziariis e strumentâls che i son assegnadis.

53.3. A restin validis lis disposizions in vore in materie di responsabilitât penâl, civîl, amministrative, contabile e disciplinâr previodudis pai dipendents des Aministrazions Publichis.

Art. 54
(Il responsabil di servizi)

54.1. Il responsabil di servizi al à compits di direzion e gjestionai, ancje a valence esterne, relatîfs ae strutture coordenade, su la fonde di ce che al è previodût di chest statût e dal regolament sul ordenament dai Uficis e dai Servizis.

54.2. Il responsabil di servizi al è responsabil dal risultât de ativitat puartade indevant di lui in maniere direte e di chê puartade indevant dai servizi coordenât, de gjestion dal personâl e des risorsis finanziariis e strumentâls che i son assegnadis.

54.3. A restin validis lis disposizions in vore in materie di responsabilitât penâl, civîl, amministrative, contabile e disciplinâr previodudis pai dipendents des Aministrazions Publichis.

CJAPITUL V – INCJARIIS E PROFESSIONALITÂTS SPECIFICHS

Art. 55 (Contrats a timp determinât)

55.1. Par cuvierzi i puescj di cualifiche dirigenziâl, di responsabil dai servizis o dai uficis, o di specializazion alte, si podarà avalêsi di contrats a timp determinât.

55.2. Lis personis incjariadis a varan in ogni câs di vê i requisîts demandâts pe cualifiche di cuvierzi.

55.3. Il regolament pe organizazion dai uficis e dai servizis al definirà lis proceduris di aplicazion di chest articol.

Art. 56 (Professionalitâts specifichis)

56.1. Pe definizion e realizazion di obietîfs particolârs e specifics a contignût di professionalitât alt, che nol è pussibil di gjestî cu lis sô structuris, la Aministrazion e podarà avalêsi di colaboradôrs esternis.

56.2. Te programazion dai interventis e des iniziativis si varà prin di dut di individuâ, li che al è pussibil, i obietîfs di afidâ ai colaboradôrs esternis, fissant timps, coscj, sogjets e proceduris.

56.3. Po dopo, la Zonte e procedarà cuntun so at deliberatîf a sottoscrivi convenziions specifichis cui colaboradôrs incjariâts.

CJAPITUL VI – SERVIZIS

Art. 57 (Rapuaris cui Comuns associâts)

57.1. La Comunitât di Mont e organize e e gjestis i servizis e lis funziions amministrativis che i son stadis tribuidis par deleghe o che i son stadis conferidis dai Comuns associâts.

57.2. L'afidament di cualsisei servizi di bande des aministrazions comunâls interessadis al à di jessi fat cun at formâl, dacuardi cu la Comunitât di Mont che e stabilis timps, mûts, coscj e cuviertidure finanziarie de gjestion delegade o conferide.

TITUL VI – LA FINANCE E LA CONTABILITÂT

CJAPITUL I – LA GJESTION ECONOMICHE

Art. 58 (Finanziaments)

58.1. Tal ambit e tai limits imponûts des leçs su la finance locâl e des leçs regionâls, la Comunitât di Mont e à une sô autonomie finanziarie fondade su sigurecis di risorsis sôs e trasferidis.

58.2. La finance de Comunitât di Mont e je costituide di:

- a) trasferiments regionâi;
- b) altris jentradis, ancje di nature patrimoniâl;
- c) risorsis par investments.

Art. 59 **(Belanç e programazion finanziarie)**

59.1. L'ordenament finanziari e contabil de Comunitât di Mont al va daûr des disposizions di leç in materie.

59.2. Il belanç di prevision pal an sucessîf al à di jessi deliberât dentry dal tiermin stabilît de leç par ogni an solâr.

59.3. Inte redazion e predisposizion dal belanç bisugne rispietâ i principis de anualitât, de universalitât, de legalitât, de veridicitât, de publicitât e de paritât economiche e finanziarie. Il belanç al è completât de relazion di prevision e di program, e dal belanç plurienâl, elaborât in tiermins di competence e di durade tant che chel regionâl.

59.4. Il belanç e i documents zontâts a rispietin i principis de clarece e de specificazion.

59.5. Ducj i documents a saran di leture semplice e intai particolârs, par programs, servizis e interventi.

59.6. Il belanç al è fat bon dal Consei de Comunitât di Mont cu la maiorance semplice dai Conseîrs che a votin.

Art. 60 **(Risultâts di gjestion)**

60.1. I risultâts di gjestion, par ce che al rivuarde jentradis e coscj sostignûts, a vegnin calculâts cun contabilitât analitiche tal cont consuntîf, che al cjape dentry il rindicont finanziari e chel patrimoniâl, in plui de relazion illustrative de Zonte che e da lis sôs valutazions sui risultâts otignûts in rapuart aes risorsis aplicadis.

60.2. Il cont consuntîf al à di jessi deliberât intal an sucessîf dal Consei, dentry dai tiermins fissâts de leç.

Art. 61 **(Servizi di tesorerie)**

61.1. La Comunitât di Mont si avâl di un tesorâr pe gjestion finanziarie.

61.2. La nomine dal tesorâr e je fate dal Consei su propueste de Zonte, che e sielzarà lis cundizions miôr ufiertis dai istitûts bancjaris.

CJAPITUL II – CONTROL FINANZIARI E CONTABIL

Art. 62 (Revision economiche finanziarie)

62.1. Il Consei al elei, a maiorance semplice dai conseîrs che a votin, il Coleç dai revisôrs dai conts.

62.2. Il Coleç dai revisôrs al è sielzût tes modalitâts fissadis de leç.

62.3. Il Coleç al dure in cjarie trê agns e no si pues revocâ, gjavant il câs che nol vedi rispjetât i siei oblics di leç. Al pues vignî riolet dome une volte.

62.4. I compens dai revisôrs a son fissâts daûr des disposizions di leç in materie.

Art. 63 (Funzions e responsabilitât dai revisôrs)

63.1. Il Coleç dai revisôrs, tal esercizi des funzions che i son tribuidis par leç, al colabore cul Consei te sô funzion di indreçament e control. Par chest al à facultât di partecipâ, cence dirit di votâ, aes sentadis dal Consei ancje cuant che i lavôrs a son interdets al public e ancje, se domandât, aes sentadis de Zonte. Cun di plui al à acès ai ats e ai documents de Comunitât di Mont.

63.2. Al è compit dai revisôrs di controlâ la regolaritât contabile e finanziarie de gjestion, certificant che il rindicont al corrispuindi ai risultâts de gjestion e prontant une relazion specifiche che e compagni la deliberazion consiliâr che e fâs bon il cont consuntîf.

63.3. Il revisôr al rispuint de veretât des sôs attestazions e al adempîs ai siei dovês cun diligence e onestât, riferint daurman al President e al Segretari di ogni iregolaritât che e sedi stade aciertade te gjestion dal Ent.

63.4. Par ce che al rivuarde i requisîts sogjetîfs di eleibilitât e i istitûts de decjadence e de revoche, si aplichin al revisôr lis disposizions di leç in materie.

Art. 64 (Formis di control economic interni de gjestion)

64.1. Un regolament fat di pueste al stabilîs normis specifichis:

- a) pe rilevazion des jentradis e dai singui servizis;
- b) pe definizion normative dai rapuarts tra revisôr e orghins eletîfs di guvier, orghins eletîfs di control, indreçament e partecipazion, e orghins burocratics deputâts ae gjestion esecutive de ativitât amministrative;
- c) pe definizion puntuâl dai compits e dai podês dai revisôrs.

64.2. La rilevazion contabile dai coscj e previôt la racuelte sistematiche, articolade par setôrs, programs e intervents, dai dâts gjestionâi riferîts aes diviersis unitâts operativis, di mût di valutâ la eficiencie e la eficacitât des diviersis azions a pet dai coscj sostignûts, e ancje la determinazion e la elaborazion dai indiçs di produtivitât.

64.3. La Zonte de Comunitât di Mont cu la aprovazion dal P.E.G. (Plan Esecutîf di Gjestion) e individue i centris di cost e e met in vore formis specifichis di rilevazion.

Art. 65
(Metodologie dal control interni di gjection)

65.1. La aplicazion dal control interni di gjection e cjape dentri chestis fasis:

- a) la planificazion;
- b) la programazion;
- c) la redazion e la gjection dal bilanç di prevision anuâl e dal P.E.G. (Plan Esecutîf di Gjection);
- d) l'esam dai risultâts otignûts tes fasis programadis, pe verifiche e pe analisi di ogni difference eventual.

CJAPITUL III – PROPRIETÂTS IMOBILIÂRS

Art. 66
(Demani e patrimoni de Comunitât di Mont)

66.1. La Comunitât di Mont e podarà disponi di un so demani e di un so patrimoni daûr di ce che e stabilîs la normative in vore in materie.

66.2. La discipline dai bens demaniâi e patrimoniâi e sarà ogjet di regolament di puest che al vignarà fat bon dal Consei.

TITUL VII – I ISTITÛTS DI COOPERAZION
Art. 67

(Colaborazion cun sogjets publics e privâts)

67.1. La Comunitât di Mont e pues promovi formis di cooperazion e/o di associazion cun altris ents e organisims publics pe organizazion e pe gjection des risorsis sociâls e economicis presintis sul so teritori, in relazion aes sôs finalitâts istitutivis e ai obietîfs de sô programazion, zovantsi dai struments previodûts dal ordenament locâl.

In particolâr si favorissin lis formis di partecipazion dai sogjets privâts che a operin tal teritori comprensoriâl e che a rapresentin interès sociâi e economics leâts al disvilup di chel teritori.

Art. 68
(Formis di gjection)

68.1. La Comunitât di Mont e pues programâ, organizâ e gjestî lis sôs iniziativais e ativitâts sociâls e economicis daûr di criteris imprenditoriâi che a 'nt garantissin la eficiencie, la eficacitât e la economicitât.

La siele des formis associativis di intervent e ven fate su la fonde di intesis e/o acuardis cu lis parts interessadis che a 'nt metin in evidence i aspiets procedurâi, realizatîfs, gjectionai e finanziariis e in particolâr i cosej e i beneficis previodûts.

I modei metûts in vore, ai fins organizatîfs e di esercizi, a puedin jessi chei previodûts dal ordenament (Societâts di capitâl, Convenzioni, e v.i.), ma in ogni câs a àn di jessi compatibii e coerents cu lis carateristichis ogjetivis e lis dimensions obietivis de iniziative.

**TITUL VIII – DIRITS DAI CITADINS;
GARANZIIS E ISTITÛTS DI PARTECIPAZION
CJAPITUL I – DIRITS DAI CITADINS**

**Art. 69
(I dirits dai citadins)**

69.1. La Comunitât di Mont, par tutelâ il citadin tai confronts de aministrazion, tal esercizi des sôs funzions e garantîs chescj dirits: dirit di acès e di informazion, dirit di partecipazion al procediment, dirits di consultazion e di control sociâl, dirit a un tratament just e imparziâl.

CJAPITUL II – GARANZIIS E ISTITÛTS DI PARTECIPAZION

**Art. 70
(Publicitât dai ats, dirit di acès e di informazion, dirit di partecipazion al
procediment aministratîf)**

70.1. Ducj i ats de Comunitât di Mont a son publics, gjavant chei risiervâts par esprese indicazion di leç o ben par efiet di une temporanie e motivade declarazion dal President de Comunitât di Mont che al indi improibîs la esibizion, in conformitât cun ce che al è previodût des normativis in vore.

**Art. 71
(Referendum consultîf)**

71.1. 3.000 citadins, iscrits intes listis eletorâls dai Comuns che a fasin part de Comunitât di Mont, che a rapresentin almancul 1/3 dal totâl dai Comuns stes, a puedin domandâ la convocazion di referendums consultîfs su materiis dulà che la Comunitât di Mont e à la competence deliberative e che a rivuardin i interès di dute la comunitât comprensoriâl.

71.2. No son materiis di consultazion referendarie:

- a) lis elezions, lis nominis, lis designazions, lis revochis, lis declarazions di decjadence e, in gjenerâl, lis deliberazions o lis cuestions che a rivuardin personis;
- b) i ats relatîfs al personâl de Comunitât di Mont e dai ents dipendents;
- c) il regolament dal Consei;
- d) i balançs e i conts consultîfs.

71.3. Vie pal an si pues davuelzi dome une consultazion che si riferîs a un o plui referendums.

71.4. Il regolament al discipline, in conformitât cu la normative statâl e regionâl in materie di procediment aministratîf, la composizion e i compits dal comitât promotôr, la composizion e il funzionament dal comitât di esperts competent a pandi il judizi di amissibilitât dal referendum, i tiermins, lis modalitâts e lis garanziis pal davuelziment dal referendum e i tims che dentri di chei il Consei al pues intervignî cun sô deliberazion par evitâ la convocazion dal referendum.

71.5. Il comitât di esperts daûr dal come 4 al è elet dal Consei a scrutini segret e cun vôt limitât a un.

71.6. Il President de Comunitât di Mont, dentri di un mê s de proclamazion dal risultât dal referendum, al iscrîf intal ordin dal dì dal Consei il dibatit relatîf.

Art. 72

(Istancis, petizions e propuestis)

72.1. I citadins, singui o associâts, residents o domiciliâts in un dai Comuns che a fasin part de Comunitât di Mont, a puedin presentâ al President de Comunitât di Mont istancis par domandâ lis resons di determinâts compuartaments o ben su aspiets de ativitât aministrative, o petizions cul fin di inviâ la iniziative dai orghins de Comunitât di Mont su cuestions di interès coletîf. Il President al à di rispuindi, cun at motivât, dentri di 60 dîs di cuant che e ven presentade la istance o ben la petizion.

72.2. 2.000 citadins, iscrîts intes listis eletorâls dai Comuns che a fasin part de Comunitât di Mont e che a rapresentin almancul 1/5 dal totâl dai Comuns stes che a àn di fâ autenticâ lis lôr firmis di un segretari gjenerâl o di siei delegâts, a puedin meti in vore, intai timps e intai mûts fissâts dal regolament, la iniziative dai ats di competence dal Consei.

Art. 73

(Consultazion e istrutorie publiche)

73.1. La Comunitât di Mont, tai mûts fissâts dal regolament, e pues meti in vore, tal procediment di adozion dai ats di competence, formis di consultazion dai citadins tant che sondaçs, assembleis e audizions promovudis dal President de Comunitât di Mont e de Zonte.

73.2. Tai procediments aministratîfs che a rivuardin la stesure di regolaments o di ats aministratîfs di caratar gjenerâl, la adozion dal proviodiment finâl e pues jessi precedude di une istrutorie publiche tes modalitâts fissadis dal regolament. La istrutorie e pues jessi ordenade dal Consei, su propueste de Zonte, di almancul 3 grups consiliârs o di almancul 3.000 citadins residents tai Comuns che a fasin part de Comunitât di Mont e che a rapresentin almancul 15 di chesj Comuns

73.3. La istrutorie dal come 2 si fâs te forme di contraditori public, dulà che a puedin partecipâ, traviers de persone di un espert, dongje de Zonte e dai grups consiliârs, ancje associazions e comitâts di citadins. Il proviodiment finâl al è motivât cun riferiment ai risultâts de istrutorie.

Art. 74

(Formis associativis)

74.1. La Comunitât di Mont e favorîs la ativitât di associazions, comitâts, ents esponenziâi, che a operin sul propri teritori, e sosten e e valorize lis libaris formis associativis, la lôr costituzion e il lôr potenziament, cun particolâr rivuart a chês che, cence fins di vuadagn, a smirin finalitâts sientifichis, culturâls, religjosis, di promovion sociâl e civîl, di difese dal ambient naturâl e dal patrimoni artistic e culturâl, di assistence, sportivis, dal timp libar, tant che struments di formazion dai citadins.

74.2. La Comunitât di Mont e interven cu la concession di sovenzions, contribûts, sussidis e jutoris finanziariis e ancje pe assegnazion di vantaçs economics a pro des iniziativais promovudis dai sogjets daûr dal come 1, fissantindi za prime criteris e modalitâts cun regolament.

74.3. Tignint presintis lis specificitâts linguistichis e culturâls dal so teritori la Comunitât di Mont e promôf la costituzion di une specifiche Comission consultive che e sedi quartevôs des cuestions

socioeconomiche e culturali, des opinions e des propuestis dai citadins e des associazions che in plene libertât si associin ae comunitât furlane e a chê slovene.

Art. 75
(Dirit a un tratament just e imparziâl)

75.1. L'acès ai servizis publics de Comunitât di Mont e la lôr erogazion a van daûr di criteris di imparzialitât e di avualiance di ducj i utents, cence nissune distinzion.

TITUL IX – AUTONOMIE NORMATIVE: IL STATÛT E I REGOLAMENTI

CJAPITUL I – IL STATÛT DE COMUNITÂT DI MONT

Art. 76
(Autonomie normative)

76.1. In graciis de autonomie normative ricognossude ai ents locâi dal art. 117 come 6 de Costituzione, e des disposizions pal inzornament dal ordenament de Republiche, tant che fissadis dal art. 4 come 5 de leç n. 131/2003, la Comunitât di Mont e je titolâr di potestât statutarie e regolamentâr.

Art. 77
(Adozion e modificazions dal Statût)

77.1. Il statût al ven fat bon tes modalitâts previodudis de legislazion regionâl in materie; il regolament dal Consei al pues previodi normis integrativis su lis modalitâts di votazion.

77.2. Il statût al pues jessi modificât, tes formis dal procediment di adozion, su iniziative de Zonte, o ben di une frazion dal Consei di almancul 1/3 dai conseîrs, a prossimade al numar intîr superiôr, o ben di une frazion dal cuarp elettorâl di almancul 1/10 dai eletôrs de Comunitât di Mont.

77.3. Passât dibant il tiermin di 90 dîs de date che a son stadis decidudis modificazions ae legislazion in materie, e vignarà metude in vore, pes parts che a son limit no derogabil pe autonomie statutarie de Comunitât di Mont compatibilis cun chest statût, la gnove discipline.

CJAPITUL II – I REGOLAMENTI

Art. 78
(Contignût e materiis)

78.1. Tal rispjet dai principis fissâts de leç e di chest statût, la Comunitât di Mont e pues adotâ regolamenti in dutis lis materiis di sô competence e, in particolâr, e à di adotâ regolamenti pe discipline di chestis materiis:

- a) funzionament de Comunitât di Mont;
- b) procediment amministratîf, dirit di acès e di informazion;
- c) organizazion dai uficis, dai servizis e dal personâl;

- d) concession di sovvenzioni, contributi, sussidi e jutoris finanziari; atribuzion di vantaçs economics par sostignî lis iniziativas promovudis di associazions, comitâts, ents esponenziâi che a lavorin sul so teritori; discipline dai contrats;
- e) contabilitât.

Art. 79
(Adozion, jentrade in vore e modificazions)

79.1. La potestât regolamentâr e je esercitade dal Consei, cu la ecezion dal regolament su la organizazion dai uficis, dai servizis e dal personâl, che al è adotât de Zonte.

79.2. La iniziative regolamentâr i spieta ae Zonte, o ben a une frazion dal Consei di almancul 1/3 dai conseîrs, arossimade al numar intîr superiôr, e e je esercitade tes modalitâts previodudis dal regolament dal Consei.

79.3. Ogni disen di regolament al è sometût, tai câs previodûts dal regolament dal Consei, al esam de comission consiliâr competente par materie o costituide di pueste, e po dopo al è esaminât dal Consei, che lu fâs bon articul par articul e cun votazion finâl.

79.4. Il regolament al fisse cun di plui i procediments abbreviatîfs pai câs che a 'nt sedi stade declarade la urgjence.

79.5. I regolaments a son fats bogns a maiorange dai components dal orghin che al delibere, tes proceduris previodudis dai regolaments sul funzionament di chel orghin, cu la ecezion dal regolament dal Consei e dal regolament che al discipline la partecipazion al procediment aministratîf, il dirit di acès e di informazion, che a vegnin adotâts a maiorange assolude dai conseîrs assegnâts.

79.6. I regolaments, subite dopo la adozion de deliberazion di aprovazion, a son publicâts te liste dal Comprensori montan; a jentrin in vore la diesime cuinte dì dopo de dì che a son stâts publicâts.

79.7. Pes modificazions dai regolaments si aplichin lis disposizions dai comis parsore.

79.6. I regolaments, subite dopo la adozion de deliberazion di aprovazion, a son publicâts te liste de Comunitât di Mont; a jentrin in vore la diesime cuinte di dopo de di che a son stâts publicâts.

79.7. Pes modificazions dai regolaments si aplichin lis disposizions dai comis parsore.

TITUL X – NORMIS TRANSITORIIS E DI RIMANT

Art. 80 (Normis transitoriis)

80.1. Dulà che a son compatibilis e fintremai ae jentrade in vore di chest Statût, si aplichin ae Comunitât di Mont, par dut ce che nol è regolât de leç istitutive regionâl, lis disposizions previodudis tal Statût fat bon cun deliberazion dal Consei n. 21 dai 12.12.2003.

Art. 81 (Normis di rimant)

81.1. Par ce che nol è previodût in chest Statût si aplichin lis disposizions in materie di ordenament e di organizazion dai Comuns dal Friûl Vignesie Julie, e ancje lis disposizions di leç che a nomenin lis Comunitâts di Mont.

La jentrade in vore di gnovis leçs, che a contegnin principis che a son limits no derogabii pe autonomie normative des Comunitâts di Mont, e abroghe lis normis statutariis no son compatibilis cun jê. Il Consei de Comunitât di Mont al adegue il Statût dentri di 120 dîs de date di jentrade in vore des leçs ditis parsore.